

法亦得華積陀羅尼咒於現世中常得強記
智慧深信從今身乃至涅槃常一聞持一切
聞見一切經教一切學解一切技藝通達無
礙於一切三昧深得清淨解四聖諦無上法
輪說是經已師子威等天龍八部一切大衆
歡喜奉行

華積陀羅尼神呪經

師子奮迅菩薩所問經

失譯人名今附東晉錄

如是我聞一時佛在阿耨大池邊龍王宮中
與大比丘僧五百人俱大菩薩衆滿足千人
皆得陀羅尼住於十地應紹尊位一生當得
阿耨多羅三藐三菩提於諸法界通達無礙
以大莊嚴而自莊嚴於佛智德心無疑滯爾
時有一菩薩名師子奮迅來在會坐即從座
起整衣服偏袒右肩右膝著地合掌向佛白
佛言世尊若有衆生以敬信心供養佛者得

幾許福佛告師子奮迅菩薩言善男子莫作是言所以者何若供養佛論其福聚無量無邊何以故如來成就無量戒身定身慧身解脫身解脫知見身故師子奮迅若有衆生見一切智淨信心供養恭敬尊重讚歎施諸所安承服飲食卧具醫藥安身所須以如是等能十現在供養若復有人於佛滅後供養舍利如芥子許是二人福正等無異復次師子奮迅若有在家菩薩以如須彌山等七寶聚供養聲聞緣覺乘人復有出家修道之人因菩提

心持一小錢以用布施此福勝前百分千分百千萬億分阿僧祇分不可稱計算數譬喻所不能及復次師子奮迅若有衆生百千歲中以一切樂具現在供養於佛世尊若復有一人於佛滅後若以一華供養如來若掃灑佛塔若塗治塔地燒香然燈旛蓋妓樂以供養佛作如是言南無佛陀於無量阿僧祇劫備修苦行集諸功德成等正覺利益成就無量衆生若能如是起真實心供養佛者是人於後若一劫若百劫若千萬劫不墮惡道復

次師子奮迅有陀羅尼名曰華聚我今為欲
利益安樂饒益多衆生故憐愍世間利安天
人故今當說之師子奮迅若有受持此華聚
陀羅尼者是人常得宿命智通後終不墮三
惡道中生無難處不離三寶終不生於下賤
之家不離念佛所往受生諸根不缺生生不
失菩提之心生得種種甚深辯才常見十方
阿僧祇佛爾時世尊即說此陀羅尼
多姪𧑦 屠邏𧑦 陀羅尼 牟𧑦 波邏
娑散𧑦 悉題獸題𧑦 那牟支 涅呵𧑦

盧伽波提 佛提波提提𧑦 迦邏知郁迦
吒邏殊波竭𧑦 𧑦殊波提肥舍 邏佛提
旦摩娑嘶呵叉蛇𧑦 波伐𧑦 阿滅律多
𧑦 波休多題𧑦殊伐提 呢提蛇 三摩
頰𧑦 𧑦殊伽邏伐提提拏佛提 因提利
蛇佛提 莎訶
師子奮迅若有聞是華聚陀羅尼名以淨信
心憶念誦持欲修行者應用二月三月八月
行之從月八日修念佛心乃至十五日晝三
時夜三時一心念佛以香華燈明供養三寶

至十五日見一切佛乘蓮華座而爲說法得陀羅尼憶念堅固意志明了從是以後乃至菩提一切所聞憶持不忘一切經書工巧技術一切三昧心得清淨除見四諦何以故此法無漏所攝故說是法時師子奮迅菩薩及諸菩薩比丘天龍夜叉乾闥婆阿修羅世人非人聞佛所說歡喜奉行

師子奮迅菩薩所問經

佛說華聚陀羅尼呪經

失譯人名今附東晉錄

如是我聞一時佛在阿耨達多龍王宮中與諸比丘五百人俱菩薩摩訶薩滿足一千盡是一生補處皆得陀羅尼位龍十階十地猶如王子不久當得紹繼王位此諸菩薩亦復如是有大功德而自莊嚴不久當得灌頂之位得成作佛此諸菩薩各從他方諸佛世界而來集會於諸佛所心無疑滯時會衆中有一菩薩名曰師子奮迅從座而起偏袒右肩右膝